



月屋漫藁卷三

天台山人黃 庚 著

西秦菊存張 樸 較正

雪川居士高世昌 叅訂

清源門壻林伯良 集

七言律詩

枕易越中詩社試題都魁

古鼎烟銷倦點朱
脩然高卧夜寒初
四簷寂寂半床夢
兩鬢蕭蕭一卷書
日月冥心知代謝
陰陽回首驗盈虛

起來萬象皆吾有收拾乾坤在草廬

考官李侍郎應祈批詩題莫難於枕易自非作家大手筆詎能模寫蓋以其不涉風雲雨露江山花鳥此其所以為難也予閱三十餘卷鮮有全篇純粹正如披沙揀金使人悶悶忽見此作若紛紛盆盎中得古罍洗把玩不忍釋手此詩起句倦字便合睡意額聯氣象優游殊不費力曲盡枕易之妙頸聯冥心回首四字極其精到結句如萬馬橫奔勢不可遏且有力量全篇體制合法度音調諧宮商三復降歎此必騷

壇老手望見旗鼓已知其為大將也冠冕衆作誰曰不然

棋聲

何處仙翁愛手談時聞剝啄竹林間一枰子玉敲雲碎
幾度午窓驚夢殘緩着應知心路遠急圍不放耳根閑
爛柯人去收殘局寂寂空亭石幾寒

題李藍溪梅花吟卷

孤芳不與衆芳同肯媚東君事冶容寒苦一生蘇武雪
清高千古伯夷風瓊瑤照樹偏宜晚鐵石盤根却耐冬

幾度看花立霜曉斷腸都在角聲中

秋夜

博山香冷夜將闌紅影搖窗燭未殘庭樹露濃花氣濕
井梧風老葉聲乾世情冷暖知心少朋舊東西會面難
一段客愁吟不就無言背月倚闌干

秋夜和月山韻任月山主人也

涼夜殘燈照客愁衾單添盡鸛鷓裘半窗明月三更夢
一枕西風兩鬢秋吟骨稜稜寬帶眼歸心切切望刀頭
何時束篋家山去獨駕柴車訪伯休

蘭亭會飲觀晉帖

祇說清談晉業虛蘭亭之樂後來無一時人物已陳迹
千古山林空畫圖鐘帶夕陽來遠寺碑和春雨臥平蕪
昭陵玉匣猶難保筆意從誰認鼠鬚

春游次王修竹監簿韻

天色新晴帶薄寒主人飲客出城關蘭亭觴詠尋羲帖
窳石衣冠弔禹山春水斷橋芳草碧曉風啼鳥落花閑
囊中詩句壺中酒何必仙人大小還

修竹宴客東園

二月春光潑眼濃
攜樽宴客小亭東
酒當半醉半醒處
春在輕寒輕暖中
拂檻柳添吟鬢綠
壓闌花妬舞衣紅
晚來聽唱梁州曲
聲繞吳姬扇底風

書懷

剛腸不撓是男兒
舌在囊中豈足悲
落落世情難苟合
徨徨客路欲何之
舊時風月堪遺恨
好處江山尚欠詩
莫把閑愁縈素抱
人生雙鬢易成絲

送張伯威提舉

人生聚散等浮漚
憶昔過從與勝遊
棋局敲殘清夜月

菊花吟老半窻秋
客中送客難為別
山外看山捲是愁
回首片帆江路遠
疎煙斜雨到西州

春日即事

園林芳事漸闌珊
客思無聊午夢殘
紅杏花繁蜂蜜飽
碧芹香老燕泥乾
光陰有限鬢已白
勲業無成心尚丹
倚遍吟闌天欲暮
一簾風雨捲青春

小酌

小酌園林酒半醺
落紅影裏惜餘春
插花歸去蜂隨帽
傍柳行來鶯避人
白髮尚為千里客
黃金難鑄百年身

何時歸賦滄浪水，澣我征衣萬斛塵。

城南即事

支筇破曉出南城，古寺淒迷草自生。
幾處亭臺空鎖鑰，百年人物盡丘塋。
雕梁語燕應無主，廢圃殘花似有情。
世事轉頭皆夢境，浮生何用苦營營。

夜坐次林梅山韻

人倚幽窗夜未闌，竹爐灰冷篆煙殘。
一天露氣星辰濕，萬壑風聲草木寒。
老去客懷多感慨，年來世事轉艱難。
何時歸隱孤山下，明月梅花約共看。

有感

自嘆文章不遇時，平生壯志與心違。
十年湖海無家住，千里鄉關有夢歸。
殘夜月寒燈暈淡，高秋天濶雁聲微。
傷今思古愁無奈，老淚斑斑濕客衣。

即事

蠅頭蝸角兩無營，心地寬閒景亦清。
山色淺深分遠近，雲容舒卷弄陰晴。
曉憲對菊思元亮，秋緡紉蘭效屈平。
獨倚西風凝望眼，一行雁影夕陽明。

生朝自述

都道人生七十稀老逢初度歎衰遲飛觴醉月貧無酒
走筆迎春富有詩憔悴自憐蒲柳質劬勞空起蓼莪思
門無賀客清如水獨對蘭花誦楚辭

雪

片片隨風整復斜飄來老鬢覺添華江山不夜月千里
天地無私玉萬家遠岸未春飛柳絮前村破曉壓梅花
羔羊金帳應粗俗自掬水泉煮石茶

九日客懷

烏帽斜欹白髮侵老來空憶舊登臨一枝黃菊西風淚

數畝蒼苔故國心梧顫秋聲庭露冷雁傳寒信塞雲深
不須貰酒酬佳節只把陶詩細細吟

舟次樗蒲廟

短棹衝寒過浦東偏舟一葉載詩翁斷煙流水殘雲外
古木荒祠夕照中吟罷小樓何處笛酒醒孤枕半江風
潮生潮落朝還暮堪嘆人生自轉蓬

月夜登樓

玉宇澄清暮靄收吟邊怕倚仲宣樓寒蟾千里夜如畫
新雁一聲天欲秋湖海誰青豪傑眼風霜易白少年頭

更殘忽聽荒城角吹老梅花搃是愁

送慈州茅主簿入道

儒冠不戴戴星冠人世榮華作夢看譜出三茅終得道
趣同五柳早休官月寒緱嶺來笙鶴春藹慈州憶枳鸞
笑指方壺最深處凌空霞珮玉珊珊

月夜次修竹韻

徙倚吟闌傍野塘古誰蓮漏滴更長月堦夜靜蛩聲切
竹院秋深鶴夢涼坐挹水風侵袂冷眠分花露滿身香
浩歌欲遡明河去醉喚天孫織錦囊

寓浦東書懷

子規聲裏已非春消遣光陰只苦吟肘後無方醫白髮
床頭有易勝黃金年來不作功名夢老去全休富貴心
獨抱焦桐遊海角紛紛俗耳少知音

呈營田司杜希聖提領

行李担書一鶴隨蓮香幰幕政聲馳山川太史九州記
桑稼豳風七月詩如晦箕裘傳相種少陵衣鉢付孫枝
謀身儒術誰云拙堯舜君民正此時

寄毛素軒宣尉

旌麾曾駐鑑湖邊
別去匆匆又兩年
清夜夢分千里月
同鄉人各一方天
素知心事有鷗在
欲寄音書無雁傳
見說使星臨浙右
明朝便買渡江船

酒趣

濁醪妙理契心期
小甕新菑香滿卮
閑裏一生長是醉
飲中三昧有誰知
幕天帝地忘形處
枕麩眠糟得意時
此味靈均應未解
獨醒到死欲何為

秋懷

雨裏西風已倦遊
老懷悲感不禁秋
世無阮籍誰青眼

今有杜陵人
白頭雁擺行
知兄弟義燕營巢
為子孫謀
誰憐湖海飄蓬客
隻影孤燈相對愁

偶書

頻年踪跡墮江湖
三徑荒苔憶舊廬
身老方知生計拙
家貧漸覺故人疎
松薪拾去朝炊黍
漁火分來夜讀書
怨鶴驚猿應待我
台山何日賦歸歟

觀史

梧風蕭瑟雨初晴
涼入書堂夜氣清
耿耿蘭膏照千古
遲遲蓮漏轉三更
力於興廢應難助
氣為忠邪幾不平

掩卷長嗟方就枕
窓前呬喔又雞鳴

暮春

寂寞園林三月時
客中幾度見春歸
柳眉綠皺鶯無語
花臉紅銷蝶倦飛
節物晴催雙鬢老
功名長與寸心違
百年身世成何事
回首西山又落暉

對月

萬里無雲天宇寬
十分秋色上樓看
月浮滄海蟾光濕
星落明河象緯寒
醉後儘教詩筆健
吟邊莫放酒杯乾
一聲長笛知何處
愁殺夜深人倚闌

秋夜

十分秋色滿軒窓
景物淒清夜氣涼
篩月簾櫳金瑣碎
搗霜砧杵玉丁璫
井梧葉脫無多影
岩桂花稠不斷香
坐到更深吟興動
硯池滴露寫詩狂

寓舍即事

矮屋編茅槿縛籬
詩人住處恰相宜
萬間突兀夢不到
一室淒清心自知
窓下無燈童睡早
林間有月鶴歸遲
八荒便作庭除看
南北東西任所之

書懷奉簡蘭若提舉

十年湖海歎飄零晚景投閑百念輕
看水看山真有味
學書學劍恨無成
竹風吟曉詩情動
梧雨敲秋客夢驚
老傍人門非久計
不如歸去學淵明

登寶林飛來峯

有井通海在塔下
龜公墓越王臺在側

乘風飛步碧崔嵬
萬壑千巖入眼來
古梵直穿滄海破
浮圖高拂白雲開
龜公埋沒今無塚
烏啄登臨舊有臺
立盡斜陽不歸去
一聲孤雁過蓬萊

題吳實齋北山別業

北山佳景勝南山
乘興登臨眼界寬
樵斧伐雲春谷暗

漁榔敲月夜溪寒
一區池占林泉勝
四面天開圖畫看
竹屋數間塵不到
主人日日凭闌干

書館

池館深深鎖翠涼
課餘多暇日偏長
屋連湖水琴書潤
窻近花陰筆硯香
吾道尚存貧亦樂
客身長健老何妨
十年心事閑搔首
厭聽蟬聲送夕陽

依綠亭

數椽瀟灑瞰清漪
蕩漾煙霏欲濕衣
闌寒光搖翡翠
簷牙倒影浸琉璃
荷邊鼓瑟遊魚聽
柳外敲棋睡鷺飛

洗盡紅塵青眼客臨流何惜賦新詩

秋思

天容凝碧換秋容殘暑冷然一洗空梧葉多應愁夜雨
葛衣漸覺怯西風十分冷淡砧聲外一片淒涼雁影中
興動尊鱸欲歸去季鷹心事恰相同

題四暢圖

四暢圖中四散人藤床對坐遣閑情搔頭真有爬梳態
搐鼻應無噴嚏聲捫蝨未能談世事撫髭元不為科名
一時快意皆真樂誰把丹青寫得成

登寶林塔

屹立浮圖可摘星吟邊喜與客同登闌干六曲又六曲
梯級一層又一層極目江山無障礙着身霄漢欲飛騰
雁來疑是題名處拂拭殘碑問寺僧

偶述

漂泊江湖祇自憐人生窮達信關天老來干祿心灰矣
貧不求人氣浩然五斗豈能留靖節一瓢亦足樂顏淵
客來問我生涯事閉戶開書對聖賢

涼夜即事

涼入虛堂睡思濃
夜深剪盡燭花紅
光搖珠箔梧桐月
香透紗厨茉莉風
歌枕覺來人不寐
撚鬚吟罷句難工
小蠻問我詩成未
詩在池塘草夢中

次月山少監客京韻

匹馬攬春入帝京
秋深猶未問歸程
一書不及回風寄
千里空教共月明
霄漢已隨黃鵠舉
家山應負白鷗盟
便須了却封侯事
衣錦歸來客亦榮

聞角

譙角吶鳴到枕邊
邊情似向曲中傳
梅花三弄月將晚

榆塞一聲霜滿天
織錦佳人應有恨
枕戈老將想無眠
爭如二月春風市
賣酒樓頭聽管絃

舟行送王琴所之澉州

晨星寥落曙光浮
柳岸風輕送客舟
萬點遠山重叠恨
一江流水淺深愁
淡煙茅店家家曉
白露楓林處處秋
獨倚蓬窗還自笑
此身漂泊媿沙鷗

寄峽山胡府判

鑑湖狂客又西湖
筆硯生涯計已迂
五斗自慚腰不折
四方安得口能餬
家山迢遞鄉心遠
燈火淒涼客影孤

莫誤風前看落雁尺書還肯寄來無

送姜仕可去館

行止非人可豫謀愛君無計為君留張儀失策猶存古
穆傳知機可掉頭黯黯別懷江路晚蕭蕭行李驛亭秋
明年我亦攜書去不落人間第二儔

梅龍

孤根蟠屈浸冰壺蟄裏陽和發朽枯雪樹鱗封寒水玉
月梢頷吐夜明珠暗香吹冷龍涎濕踈影涵清蛻骨癯
安得華光葉公筆共描雲水卧雲圖

江湖偉觀

環峙山川秀氣鍾人煙樓閣鬱重重潮生潮落東西浙
雲去雲來南北峯海曙扶桑紅影濕堤春楊柳綠陰濃
子胥已遠岳侯死斗柄聊洗磊塊胸

隨隱為祝南山賦

踪跡何拘似白雲不專丘壑避紅塵田堪耕稼即莘野
水可釣魚皆渭濱無礙滯心寧擇地有幽閑處便容身
一筇忽入青山去豈是終南捷徑人

春日郊居

卜築幽居慰寂寥數椽茅屋傍江郊庭前藤薜筍爭長
籬下陳雷蔓結交杏圃花香蜂謀蜜芹塘泥暖燕營巢
山窻對景渾無事吟得詩成手自抄

偶書呈王修竹

琴心不復寄松蘿賀鑑湖邊水自波晚節黃花秋思淡
夕陽紅樹客愁多何時歸鶴招丁令有思逃漁侶志和
不管白頭烏帽落西風一曲付狂歌

寄鄭樞山

起敬英聲亦有年酒邊曾見錦囊篇吟情六義初刪後

古意三爻未盡前放曠嗣宗應絕俗清狂太白不妨仙
如今海內無工部誰肯題詩寄鄭虔

燈花

發生元不假栽培一點春從午夜回自喜結根依小草
不愁飛片點蒼苔熒熒有豔蛾頻撲澹澹無香蝶不猜
窻下敲棋紅燼落更深約客不曾來

樂道

門掩荒苔客到稀閒情已與世相違胸中宇宙自然景
眼底江山不盡詩雲淡風輕皆道體鳶飛魚躍揔天機

吾心與物同真樂此處寧容俗子知

次毛一齋韻

詩夢驚殘何處暮書窻又是夕陽時柳陰分綠籠琴几
花片飛紅點硯池覽鏡自憐添白髮傳杯不復倩蛾眉
東風故國年年恨惟有啼春杜宇知

寄月山少監

一片襟懷海樣寬眉頭肯為別離攢臂鷹慣識從君樂
汗馬寧辭行路難角帶邊聲關月冷寫傳鄉信塞雲寒
歸來未許東山路見說蒼生望謝安

送文正公遺像與王東廬

古畫從來寶繪堂遺君敢借舊珍藏貌存故國三公貴
澤衍來孫百世芳家廟幾年成闕典宗枝此日倍增光
當時種德根苗遠分得槐陰到鶴鄉

遊西湖次毛玉田韻

觸目錢塘昨夢非行春載酒憶當時花間不輟香輪入
柳外空鞭駿馬飛落日荒山和靖墓斷雲流水子胥祠
忘情鷗鷺閒於我應笑江湖客未歸
故國有懷呈任子宏提舉

十年不作還家夢荒草深深鎖竹扉無主落花隨水去
有情啼鳥勸人歸儒冠寥落風流減客路淒涼故舊稀
何日攜琴賦歸去踏雲自採故山薇

寒夜即事

倚徧闌干更漏長柔髭撚斷為詩忙清分梅影夜宜月
寒入雁聲天正霜懷古頓添孤客恨追歡難憶少年狂
讀書窻下篝燈坐一卷離騷一篆香

謝章平遠惠筆

管城二子樣尖新分惠山房勝餽金淮兔拔毛誇匠巧

魯魚正字見功深抄書未得纖毫力握管難忘一寸心
揮翰玉堂無夢到雅宜茅屋寫清吟

龍江館舍

幽棲俗事不相關家在青松翠竹間繞屋四圍都是水
隔林一片不多山詩篇陶寫清秋景書冊消磨白日閒
門外沙鷗如舊識忘機飛去又飛還

元日

睡眠朦朧撐不開雞聲唱曉夢驚回竹爐尚有殘冬火
栢酒初斟新歲杯身世百年如夢幻功名兩字已心灰

門無賀客清閑甚自汲寒泉浸古梅

偶題

一春過半近清明點滴簷聲未肯晴
細柳雨中垂綠重殘花風裏落紅輕
世間白髮在公道眼底青山不世情
富貴倘來忙不得人生何必苦營營

俞景仁教諭相過

江雲舒卷弄陰晴新綠園林似染成
花怯曉風寒蝶夢柳愁春雨濕鶯聲
栖遲茅屋無塵事深閉柴門遠俗情
佳客相過慰岑寂酒邊閑把近詩評

修竹有樓名與造物游對秦望山五雲門

秦望諸山隱几看仙居縹緲五雲端
天高地迴三千界月白風清十二闌
滄海氣侵珠珮濕明河影逼玉簫寒
超然身在鴻濛上何必蓬萊跨紫鸞

修竹宴客廣寒

銀橋疑駕海天長金粟離離照玉觴
影浸山河瓊殿冷舞分風露羽衣香
亦知廣莫元無野却笑溫柔別有鄉
閒折一枝驚昨夢素娥憐我授玄霜

酒邊呈張景純能畫山水

蓬萊閣上笑談餘，別後思君看畫圖。
萍水相逢俱老矣，家山自好盍歸乎。
清風一榻莊周蝶，明月扁舟范蠡湖。
此是達人真樂事，客中何必歎窮途。

江上客懷

鏡裏從渠白髮添，吟邊抵掌復掀髯。
十年為客甘清苦，一枕忘情付黑甜。
短褐怯風綿未絮，破窓漏月紙重粘。
梅花應念人孤寂，寒夜吹香入竹簾。

夜坐

香篆烟銷夜氣清，篝燈開卷遣閒情。
半窓月落梅無影

三徑風來竹有聲，樂道何須圖富貴。
讀書元不為功名，白雲滿榻便高卧。
歌枕詩成夢不成

挽衛山齋

楹夢驚殘忽告終，儒林多士失宗工。
雲間便覺無清氣，江上誰能繼古風。
蕙帳夜闌孤鶴怨，茅齋人去九山空。
我來豈為私情哭，痛哭君亡吾道窮。

其二

武公後裔有仍孫，德望才名世所尊。
擬向山中專註易，忽傳地下趣修文。
月樓不復賡詩句，春閣猶思共酒樽。

痛恨死生千古隔西風吹漏濕秋雲

送任子敏司丞赴北

鞭影拖雲入帝京少年正好作功名不辭
騎三千里
欲奮鵬搏九萬程白玉樓中揮翰墨黃金臺上被恩榮
何須折柳送行色只寫詩篇話別情

賀俞教授見寄韻

天邊日月似梭飛百歲光陰難預期有酒不妨留野客
無錢何惜典春衣江山猶記登臨處身世都非少壯時
晚景清閑宜學道黃庭一卷究玄微

任復齋池中有瑞蓮命予賦之

芙蓉開處傍池亭花結雙頭媚晚晴兩隗駢肩如欲語
二喬並首似含情同心淨植真奇種聯蒂騰芳以瑞名
若使濂溪當日見愛蓮有說恐難評

鹽

同締入貢載遺經分賜羣臣羨水晶潤下作醎從海產
熬波出素似天成享神潔白惟形似富貴珍奇以寶名
此物可方為相事他時商鼎用調羹

餅筵

熟中竟日自煎烹音節都從一氣生
緩緩煮湯方蟹眼
微微聒耳忽蠅聲頻驚清夢愁無寐
似訴羈情歎不平
却笑書生那解此聯詩石鼎羨彌明

書懷

杜門已與俗相違苔徑荒涼轍迹稀
自愛清涼忘世慮
肯求富貴後心機
隱居盤谷勝金谷耐著麻衣鄙錦衣
百歲光陰皆夢境且看兔走與烏飛

和杜柳溪韻

安貧樂道豈早微肯羨黃金帶十圍
爵列三公今却有

齒踰七袞古來稀滿頭霜雪客懷老
過眼輪雲人是非
皎皎白駒在空谷好賢誰復詠緇衣

金潤玉隱廢寺閒居

梵剎當年聚衆僧叢林深處著禪扃
金沙布地階無土
玉軸堆函藏有經雲樹千尋張翠蓋
烟蘿一片展青屏
星移物換今寥落古寺猶存栢子庭

和葺廬韻

地僻渾無車馬喧禪房修飾稱居安
莊嚴固是由心造
丹竈多應被眼瞞佛法不須身外覓
世緣只作夢中看

我來欲問無生話萬頃西江一吸乾

偶成簡任肅齋教諭

百年光景易侵尋消遣閒愁只苦吟但覺筆頭風雨濕
不知鬢底雪霜侵冥鴻已負九霄志老驥空懷千里心
富貴倘來應有命何須彈缺扣知音

其二

百歲光陰一轉蓬晚年不與少年同事因錯處人方省
詩到窮時句始工獻賦未逢揚得意憐才難遇杜司空
有時追憶昇平事猶道繁華是夢中

其三

貧病交攻久廢詩蕭然一室獨栖遲酒錢已盡琴將典
瓶粟無儲鶴亦饑豪傑不多陳仲舉結交惟欠魏無知
簞歌鐘鼎都休計畢竟窮通各有時

奉謝月山太守

太守相過慶誕辰貴能下賤見公心行厨鼎列雙魚美
衆客咸瞻五馬臨曲唱駱駝誇白雪杯傳鸚鵡擁青衿
寵頒束帛尤增感恩與滄溟一樣深

夜坐即事

霜氣侵窓冷客羶青鏡白髮老堪憐光陰明日又明日
世事一年難一年眼底江山元似舊胸中風月本無邊
道人不作陽臺夢紙帳梅花伴獨眠

和茅亦山先生雜詠

風柳吹花糝白羶鶯愁蝶恨有誰憐不知春事又三月
堪歎人生無百年清氣長留詩卷裏閒愁不到酒樽邊
山窓晝永渾無事一榻分雲枕易眠

其二

身世飄浮水上蓬閒中清事有誰同吟窓夢草添詩料

畫筆生花奪化工酒後烏烏時擊缶愁來咄咄自書空
園林寂寞春何處春在桑麻雨露中

其三

破硯塵封懶賦詩晚年才思覺衰遲耽書自笑已成癖
煮字元來不療饑風月滿懷詩可寫雪霜侵鬢鏡先知
太公八十方榮遇把釣溪邊更待時

端午月山主人酒邊即事

窓外葵榴照眼明香蒲沁酒注銀瓶自無飲量堪同醉
非慕清名傲獨醒一日沈湘悲楚客千年弔古讀騷經

他鄉記節聊隨俗艾虎硃符挂戶庭

其二

時序催人易白頭端陽懷古客添愁硃符不寫湘纍恨
角黍難包楚國羞記節何妨斟蟻酒奪標無復見龍舟
高歌思遠樓前路掩雨珠簾今在不

寄謝蔡松江路教

一別丰標又一旬尺書多荷寄殷勤交遊滿眼誰知己
契濶關心獨憶君蕙帳夢寒同夜月松江人遠隔秋雲
明朝便買扁舟去來訪貞陽舊廣文

和杜柳溪韻

白髮垂垂一老夫年來漸覺世情疎石床夢冷和雲臥
茅屋燈殘共月居客至何妨賒魯酒家貧不肯典唐書
羨君種柳清溪上借我苔磯學釣魚

和茅亦山秋夜感懷

老來吟拙自知羞好景無詩未易酌湖海愁看今夜月
功名虛度十年秋清光偏照盧仝屋孤影自登王粲樓
我欲乘風蟾窟去安能與世共沉浮

茅亦山相過

故人過我竹邊居談笑從容樂有餘
洗盞共嘗春甕酒挑燈對讀夜窗書
歸來尚憶淵明菊高卧誰知諸葛廬
醉後達觀今古事寥寥千載只須臾

上廉訪分司官

行部巡荒察吏奸皇皇使節古刑官
聲搖天上星辰動清逼雲間風露寒
肅政嚴持三尺法卹民特放一分寬
香名已覆金甌底便作他年宰相看

和鄭樞山竹夫人韻

玉環傾國起胡兵有色終汙後世名
九夏專房何在貌

一身空洞若為情寵名本自無心得
婦節從來澈骨清愁見婕妤秋後扇
共懷幽恨幾時平

斑竹夫人

汗青書墨沁肌涼李衛曾攜近竹床
眼孔盈盈看熟客淚痕點點泣秋房
湘紋冷淡宜湘簟玉體玲瓏稱玉郎
秦虢流封無夢到傍人空以睡為鄉

遊虎丘山寺

浮生偷得片時間古寺尋僧借景看
樓閣倚雲山氣濕輓轡捲水澗聲寒
地埋吳劍痕猶在碑刻唐詩字未漫

寄榻禪房不知曉起來松石已三竿

賈秋壑圃

不學蒼龍臥浙東驚飈吟珮墮青瑤既無良策安江左
空有名園似洛中危棧連雲晴亦雨飛樓近海夜生風
人間富貴皆塵土回首吳山落照紅

聞鶴

寒蟾初上海雲收何處仙禽過庾樓清夜照人千里月
碧天驚露一聲秋玉笙縹緲緱山去羽袂蹁躚赤壁遊
回首女墻舊時事千年華表動新愁

和毛宣尉蓬萊閣韻

傑閣翬飛翠靄間蓬萊元不在人寰綠圍城郭千村水
青逼簾櫳四面山華表鶴歸遼海遠高臺鳳去夕陽間
我來倚徧闌干月雲鎖重門夜不關

送張按察移節江陵

滿載琴書事宦遊皇皇使節重咨諏蒲帆風飽三千里
繡斧霜寒十六州荆渚行觀新德政越人共憶舊風流
市橋衰柳難攀折只扣梅花送去舟

次鄭朴翁國正見寄

唐漫齋卷三
雲深紅日出林遲晞髮簷前力未衰老愛歸田追靖節
狂思入海訪安期春風巷陌楊花後故國江山杜宇時
一種閒愁無着處倚窓重讀寄來詩

漁舍觀梅寄修竹

寒雲漠漠護墻陰瀟灑梅枝出竹林影落荒磯和雪釣
香浮老瓦帶春斟幾憑水驛傳芳信祇許沙鷗識素心
回首孤山千樹遠扁舟乘興夢中尋

清明

清明時節已春深白髮蕭疎忽滿簪萍梗一生孤客恨

松楸千里故鄉心浸花窻下分紅影挿柳簷前借綠陰
幸有故人同笑語不妨沽酒共清吟

贈大禪寺昉上人

佛屋叅差傍水涯天然富貴屬僧家油幢碧立當軒竹
步障紅圍繞檻花隱隱磬聲春晝永停停塔影 陽斜
白頭道者留連客自汲山泉煮石茶

贈通玄觀道士竹鄉

通玄道士苦修行坐見桑田幾變更雲屋苔封燒藥竈
風林花落煮茶鐺休糧賸有青松啖却老應無白髮生

月滿竹鄉乘鶴去欲邀子晉學吹笙

夜坐

醉月飛觴興未闌蓬壺影裏漏聲殘碧浮金鼎香脂煖
紅閃銀臺燭泪乾艷曲喜聽催拍近狂歌自覺入腔難
賞心樂事輸年少一點閒愁了不平

隱居

編茅卜隱讀書林門掩蒼苔一徑深當戶曉山長識面
臨窻夜月獨知心花園錦繡翻紅影竹列琅玕舞翠陰
別是一般清富貴何須滿塢積黃金

見梅

孤根偷轉一分陽枝北枝南次第芳照水曉粧冰鏡冷
橫空雪樹凍雲香未成林實調金鼎先占春魁伴玉堂
因憶西湖林處士年年覓句為伊忙

挽任宅雲

方擬榮除上玉堂玉樓有召返仙鄉才過賈誼同年少
齒長顏回一歲亡師友交情從此絕死生異路實堪傷
雲邊宅在人何在腸斷西風淚幾行

寄王愛梅塔下開館

諸生歸去暮庭空塔下遊觀倚瘦筇千尺寶輪擊海月
七層金鐸語天風升堂儘可同僧飯持鉢何須聽寺鐘
好把新詩題舊壁他年應有碧紗籠

送人歸洛

白眉公子氣昂昂年少多才姓氏香腹飽儒書宗孔孟
心傳醫學祖岐黃秋亭聽鶴遊吳會春館看花憶洛陽
老我自憐身是客江湖又送客還鄉

上李承旨學士

儒林學海老宗師每恨聞名識面遲一部山川司馬記

百篇風月謫仙詩玉堂揮翰思當日金鼎調元定此時
抱負大才應大用行看事業邁周伊

其二

表表聲名動縉紳金鑾奏事舊詞臣胸中千古淵源學
天下十分端正人猶記演綸依日月行看聽履上星辰
枝南枝北雲山異何日摳衣拜後塵

其三

中朝人物總稱賢恬退閒居又幾年獨把丹心長戀闕
因思綠野且歸田未應雋軌淹東魯行看文星照北燕

見說君王思國老，鶴書即下九重天。

寄月山少監

南北相望各一天，江湖久別思淒然。
迢迢道路三千里，倏忽光陰五六年。
清節立朝君可羨，白頭為客我堪憐。
折梅難寄江南信，惟有新詩數十篇。

哭別月邨

交遊惟子獨相知，此老天胡不憇遺。
行輩凋零亡益友，文風寥落失儒師。
在生曾與傳遺像，臨死猶能寄別詩。
月落邨空人不見，傷心千古隔幽期。

其二

三山秀氣孕英奇，表表才名冠一時。
唐殿策高黃不第，荆州又去粲何依。
傳家有子猶堪羨，埋骨無山亦可悲。
留得帚金詩藁在，燈窓讀罷淚沾衣。

和仇山村九日吟卷

暮秋景物覺荒涼，觸景凭高遡杳茫。
歸隱清如陶靖節，苦吟瘦似沈東陽。
煙橫晚浦蒹葭碧，霜落寒林橘柚黃。
追想漢宮當日事，賜萸宴罷謝君王。

寄錢竹深

夢斷膏粱記幾年捨身事佛絕塵緣把茅蓋屋孤峰頂
片衲蒙頭萬竹邊支遁才高交杜老參寥詩好動蘇仙
何當盡棄人間事特地來參一擊禪

見天地心松江府題

乾坤主宰妙難窺識破端倪便可知陽動於陰分太極
剝窮必復露真機化工自有經綸處生意元無間斷時
萬象皆春從此始細忝羲畫究精微

白雁

征鴻素縞過南樓衣褐同羣孰與儔雲外排行分玉李

天邊印字帶銀鈎高飛遠寒疑雲鶴低落平沙類雪鷗
夜月蘆花無認處惟聞嘹唳數聲秋

即席和衛山齋韻并呈顧淵白路教

燭夜飛觴客在山同看明月上雲端粘天水濶蟾光濕
捲海風高蜃氣寒會友幸逢三益在娛情休恨四并難
座中喜有能詩者便作唐詩顧况看

梅魂武林試中

夢覺羅浮迹已陳至今想像事如新相思一樣窻前月
似見三生石上春的的孤芳冰氣魄踈踈冷蕊雪精神

料應楚些難招至欲倩花光為寫真

書懷

湖海難鬢易絲平生壯志與心違
一千里外家何在三十年前事已非
孤正首丘應待盡鶴思華表尚忘歸
書齋兀坐懷今昔淚落西風濕客衣

甲子歲旦

天開正旦宿雲收宇宙陽回和氣浮
歲換上元新甲子時同太古舊春秋
朱顏不逐年華改清思惟從造化游
栢酒滿斟吟興動題詩記節自賡酬

白酒歌為巖翁賦

火雲燒空日色烈暑氣着人方鬱結
巖翁宴客水亭東竹色蕖香獻清絕
瓜削水晶蓮剖珠象箸犀盤盛陳列
銀罌捧出白醅透鼻香濃風味別
傳來未到心已寒灑灑瓊光瑩而潔
初疑炎帝行冬令壺結冰澌洗袪熱
又疑仙掌流沆瀣破傾來和玉屑
誰向藍田拾瑤英釀成竒液色澄澈
恐是太華井中溢修綆銅餅汲不竭
又恐夜半雷破山石髓分流乳泉裂
既非西貉綿羊酥又非緱山仙鶴血
胡為照眼光陸離藥玉盤中色難別

令入敢嚙不敢激怕有飛霜寒齒頰一杯一杯復一杯
肺腑盡化為冰雪憶昔曾誦坡仙詩白酒無聲瀉油滑
開編自覺饒涎流詎謂今朝得親啜主人醞藉如此酒
氣味清醇韻芳冽舖糟諸子醉六經抱負長才特施設
君王作醴思用賢應向商巖求麴蘖

侍郎亭

東鄰花園栽雙松一朝煨燼枝葉空侍郎庭前有雙松
至今古色摩蒼穹此木受命本千載扶持若有神始終
天留真質表文獻柯葉蕃茂根本豐百年培植飽雨露

虬枝風撼鳴笙鏞掀髯相視雪貿貿擁蓋對立雪童童
不知天地有黃落玄冥失柄春無功雲孫峩冠立亭下
典刑如侍乾淳翁昂藏自是廊廟具天矯亦有山林風
稜稜鉄面不可犯麾去秦爵如飛蓬諸孫奉酒立松下
森森頭角皆虬龍

題東山玩月圖

斜陽紅盡暮雲碧一片天光涵水色海濤擁出爛銀盤
千里婵娟共今夕主人領客登東山踏碎寒光看秋液
星河倒影浸空明露華溥玉夜氣清馮夷激水水欲立

海若辟易天吳驚孤舟捲帆泊煙嶼古木撼壑生秋聲
憑高人在金鰲背閒看潮生煙渚外老龍翻海雲氣寒
長鯨捲雪浪花碎茫茫萬頃滄浪中屹立孤峯鎖蒼翠
山巔掃石羅樽壘賓主傳杯不放杯騷客掀髯賦詩去
山童踏月攜琴來劇談浩飲不知醉仰天大笑歡顏開
倒著接離欲起舞乾坤清氣入肺腑天邊風月空四時
眼底江山自千古謝安躡屐遊東山袁宏登舟宴牛渚
庾亮南樓今在不坡仙赤壁知何許滿眼往事轉頭空
千年人物俱塵土人生光景若湍流霜痕易點雙鬢秋

胸中勿着塵俗事眉間休鎖名利愁我輩適意在行樂
古人所以秉燭遊月山追憶舊遊地盡寫風烟入縑素
我來見畫如見景想像高唐猶可賦諸君後會應可期
雲萍合散今何之安得扁舟激川去日與杖履相追隨
登山把酒醉明月共看此畫歌此詩

醉時歌

茫茫古堪輿何日分九州封域如許大僅能着我胸中
愁澆愁須是如澠酒麴波釀盡銀河流貯以倒海千頃
黃金壘酌以傾江萬斛玻璃舟天為青羅幕月為白玉

鈎月邊天孫織雲錦製成五色蒙茸裘披裘把酒踏月
窟長揖北斗相勸酬一飲一千石一醉三千秋高卧五
城十二樓剛風冽冽吹酒醒起來披髮騎赤虬大呼洪
崖拍浮丘飛上崑崙山頂頭下視塵寰一培塿揮斥八
極道遙遊

月屋漫藁卷三終

